



宋史張耒列傳



張耒字文潛楚州淮陰人幼穎異十三歲能
 為文十七時作函關賦已傳人口游學于陳
 蘇軾愛之因得從軾游軾亦深知之稱其文
 汪洋冲澹有一倡三歎之聲弱冠第進士歷
 臨淮主簿壽安尉咸平丞入為大學錄范純
 仁以館閣薦試秘書省正字著作佐郎秘書
 丞著作郎史館檢討居三館八年顧義自守
 泊如也擢起居注紹聖初清郡以直龍圖



閣知潤州坐黨籍徙宣州謫監黃州酒稅徙復州徽宗立起爲通判黃州知兗州召爲太常少卿有數月復出知潁州汝州崇寧初復坐黨籍落職主管明道官初未入潁聞蘇軾訃爲舉哀行服言者以爲言遂貶房州別駕安置于黃五年得自便居陳州未儀觀甚偉有雄才筆力絕健于騷詞尤長時二蘇及黃庭堅晁補之輩相繼歿未獨存士人就學者衆分日載酒殺飲食之誨人作文以理為主

嘗著論云自六經以下至於諸子百氏騷人辨士論述大抵皆將以爲寓理之具也故學文之端急於明理如知文而不務理求文之工世未嘗有也夫決水於江河淮海也順道而行滔滔汨汨日夜不止衝砥柱絕呂梁放於江湖而納之海其舒爲淪連鼓爲波濤激之爲風颺怒之爲雷霆蛟龍魚鱉噴薄出沒是水之奇變也水之初豈若是哉順道而決之因其所遇而變生焉溝瀆東決而西竭下

滿而上虛日夜激之欲見其奇彼其所至者
蛙蛭之玩耳江河淮海之水理達之文也不
求奇而奇至矣激溝瀆而求水之奇此無見
於理而欲以言語句讀為奇反覆咀嚼卒亦
無有文之陋也學者以為至言作詩晚歲亦
務平淡倣白居易體而樂府放張籍久於投
閒家益貧郡守翟汝文欲為買公田謝不敢
晚監南岳廟主管崇福宮卒年六十一建炎
初贈集英殿脩撰

張右史文集目錄

雍正己酉春三月惺庵用味

太倉州浦泰心傳氏手

抄謝



- 卷一 賦
- 卷二 賦
- 卷三 賦
- 卷四 騷
- 卷五 樂府歌詩
- 卷六 樂府歌詩
- 卷七 樂府歌詩

卷八

古詩

卷九

古詩

卷十

古詩

卷十一

古詩

卷十二

古詩

卷十三

古詩

卷十四

古詩

卷十五

古詩

卷十六

古詩

卷十七

古詩

卷十八

古詩

卷十九

古詩

卷二十

五言律詩

卷二十一

五言律詩

卷二十二

七言律詩

卷二十三

七言律詩

卷二十四

七言律詩

卷二十五

七言律詩

卷二十六 七言律詩

卷二十七 絕句

卷二十八 絕句

卷二十九 絕句

卷三十 絕句

卷三十一 絕句

卷三十二 絕句

卷三十三 絕句

卷三十四 絕句

卷三十五 絕句

卷三十六 哀挽

卷三十七 同文唱和

卷三十八 同文唱和

卷三十九 同文唱和

卷四十 同文唱和

卷四十一 同文唱和

卷四十二 同文唱和

卷四十三 表狀

卷四十四 啓

卷四十五 文

卷四十六 替 銘 偈 疏 評 簡

卷四十七 題跋

卷四十八 題跋

卷四十九 記

卷五十 記 傳

卷五十一 序

卷五十二 議說

卷五十三 論

卷五十四 論

卷五十五 論

卷五十六 論

卷五十七 論

卷五十八 書

卷五十九 墓誌

卷六十 墓誌

張君史文集目錄

細校定丘集中所有而石史集所無者古詩二百
七十首律詩二百三十三首絕句七首書二篇
暮迄五篇補遺六卷全無石史集中所有而充
丘集所無者不過古詩四首律詩九首清唐書海
第二傳而已但余此書律詩已先將瀛奎律髓
四卷首卷石內六不可不知

雍正己酉春三月清州前二日惺堂書時吉

花初放嬌媚可意不覺與此書相輝映也



張右史文集卷第一

宋右史譙郡張耒

文潛著

大禮慶成賦

惟宋六世皇帝踐祚之七年所以和同天人
綏靜中外垂鴻襲裕增高累厚以對於神祇
祖考者固已蒙被克塞光融翕赫六合一意
四海一口無得而言矣粵以壬申之仲冬將
有事於南郊乃詔列位恪職賦事而有司建
言惟我國家因時施禮郊丘之位天地咸在



牲幣並薦禮樂合舉而古者乃以陰陽之至
即南北之郊別位殊時薦獻異數有司其何
從於是天子惕然深思祗畏敬慎曰茲大事
我其敢專群公卿士典禮之官竭思和會以
訂不易于是議者曰先王齋明以享帝而帝
之享否雖聖人末由知之惟受福者其享之
占也恭惟國家合祭天地于茲六世矣惟我太
祖躬膺駿命以遏亂略堂皇二儀拓落八極以
定萬世之業太宗威定宇內震蕩大鹵以一

九有定天下於一尊真宗熙洽富盛符瑞委
積南牧之獮不戰請命威加北荒奏功岱宗
席安據厚不勤指顧孽獠猶羗含毒內向吏
士未來填藏竄屈伏終始太平垂五十年英宗
入纂百姓與能神考有為六服承德此可謂
受天地之福矣然則神祇之安吾享也其久
哉於是天子乃翳青雲之屋乘雕玉之輿應
龍受轡招搖翼輔輔建虹霓之脩竿兮颺彗星
之飛旂太一執節以先驅兮二十八宿拱手

布武經營而周游^流。貌貅六師。雷霆萬乘。初海
沸而雲湧。忽山峙而川靜。蓋天子粹然玉溫。
健然天運。望宮門而動色。顧執策而命進。惟
烜赫之靈源兮。實鼻祖於神明。覽光德而來
降兮。館玉宇之嚴清。張咸英之廣樂。脩干籥
之盛舞。景光交徹。鸞鶴來下。神嬉靈豫。醉爵
俎^記翼翼清廟。觀德之宮。七聖在天。時降於宗。
世有哲孫。豈弟無疆。惠我文人。瞻祖祐而念
功兮。顧禰室而感親。聖孝油然而發。中兮在位。

望而含辛。霽暘告旦。祥飈掠塵。從我髦士。來
祇精禋。御史肅吏。司馬飭兵。既逶逶遲遲。雲
流而日行兮。又洶洶業業。海運而天聲。靈旗
洪^{一作胸}旆翕赫。歎霍兮。攫擘龍虎。而亂鯢鵬。雄鷲
懔威而震伏兮。柔良化禮。而肅清。弛威弧。載
天戈兮。固已熄滅。蚩尤而折撓。搶執飛廉。圍
商羊。屬之有司兮。義和磨刮。披拂盡獻其光。
明。蓋傾都空閭。翹首跂足。俯窺履^琴傍。覘佩玉
者。忽焉不知手之加額。口之成祝也。於是皆

都城望惟宮郊坳坦其迤邐兮場圃既寒而
畢功頽青雲以連屬粲虹霓之經緯紫微下
屬於兩觀勾陳錯施於萬雉扶傾之神仰立
而拱翔德之龍下抱而曳疑神變之歟成兮
湧九地而出峙連廡千柱廣殿萬栱飛甍闢
楹洞牖屹壁酸股之隅眩目之極唐洛執筭
而莫計班倕操斤而自惑者類非資材于斷
塹而皆機杼之紡績也一室之用足以溫一
家一宮之費何啻衣一國驚霆之蹕既震洵

壑之聲咸寂敬齋寢之靜深兮何清虛而邃
密天子方端而虛儼而一多儀未舉精意已
塞甲夜始晦嚴鼓再作飛斂走伏神警鬼愕
望舒騰精以燭霄兮玄冥收威而布德靈鼉
五震軫車將中天子乃被袞執玉兮齊明莊
栗之誠動於進趨表於形容千燎具揚萬炬
畢融上揜熒惑旁燦燭龍近為朝暘遠為融
風赫赫曦曦煌煌輝列次之士野屯之師巋
如酌醇醪而御廉衣黃流汪洋璧玉照徹祥

稜衡布。協氣下。浹音為樂和。形為人悅。白質
之獸。蕭聲之鳥。紛披雜沓。應奏而舞。節陟降
既周。燎烟始升。奔星走虹。舉璧薦牲。豐隆奔
馳而仰。鶩兮祝融。焜煌而上。征闔闔兮闔
清都。后帝燕兮百神愉。圓錫蓋兮方獻輿。岳
輪固兮溟効濡。於是禮備樂成。整車而旋。萬
類環極。端門闕天。賞出千庾。恩流百川。北包
大壤。南盡島壘。西越流沙。東窮海壖。今未脫
口。雷運風傳。野無窮人。獄無宿愆。破械解縲。

負帛囊錢車。反其舍。士復其伍。効技呈木干。
鏡萬鼓。天子舉酒。以屬群公。咸曰休哉。天子
之功。

系曰於穆聖主。建皇極兮。嚴恭精禋。帝耒格
兮。柔祗並位。儼牲璧兮。文祖右坐。臨有赫兮。
于惟祖宗。有常則兮。諱兵畏刑。後貨食兮。政
有捐益。茲不易兮。帝則鑒之。歌穀錫兮。兢兢
業業。日一日兮。三載一祀。年萬億兮。不戢兮。

遊東湖賦

紛不知吾之所如今獨漫漫而若狂乘醉飽
之餘力兮遂陟巖嶮而緣岡惟大冬之粟烈兮
莽川澤之茫茫農功休乎場圃兮平陸散夫
牛羊憫大木之百圍兮慘赤立而無裳鶴鶴
群鳴而下上兮雜黃竹之青黃忽平陸之既
窮兮漸積水之汪洋曰是齊安之東湖兮右
派合乎濤江荒灣蒲寥而葭葦兮懸䟽罾乎
夕陽為舉網而無獲兮嘉魚逝而洋洋弔村
落之柴荆兮哀淮夷之陋荒呼徒侶吾還歸

兮陰風振而塵颺畏星昴之將中兮冒玄夜
之飛霜顧謂童子汝其賦詩爰有小子裒然
致詞歌曰歲窮木落兮大澤空雁宵征兮天
北風曷不飲酒兮御玄冬歸來歸來兮樂未
終余曰汝歌置之乃歌曰臨山川兮懷故鄉
歲窮陰兮晝不暘升高堂兮潔余樽耿余思
兮古之人

西堂問雙棠賦并引
雙棠者文潛寓陳僧舍堂下手植兩海棠也

始余以丙子秋寓居宛丘南門靈通禪刹之
西堂。是歲季冬，手植兩海棠於堂下。至丁丑
之春，時澤屢至，棠茂悅也。仲春且華矣。余酌^約
常所與飲者，且致美酒^樽一醉於樹間。是月之^{無事}
六日，余被謫書治行之黃州。俗事紛然，余亦
遷居，因不復省花。到黃且周歲矣。寺有書來^僧
言花自如也。余因思茲棠之所植，去余寢無
十步，欲與鄰里親戚一飲而樂之，宜可必得
無難也。然垂至而失之事之不可知如此。今

去棠且千里，又身在罪籍，其行止未能自期。
其於棠未遽得見也。然均於不可知，則亦安
知此花不忽在吾目前乎？因賦問棠以自廣
云：寓舍之壤既膏，且腴。手植兩棠於堂之隅，風
來自東，冰雪融^液洽。興視吾棠，既葩而澤，乃沽
我酒。又命我人，期一醉於樹間，聊快酬於芳
春。夾鍾之初，謫書在門。陸走千里，止於江濱。
天星一周，穆然舊春。想見吾棠，粲然含姿。俯

晚舊堂。今居者誰。婉如怨而有待。淡無言。其若思。嗟乎。始種在白我。其享在持獲。盈我旨酒。會我賓客。一酌未舉。俛仰而失。事至而驚。其初孰測。惟得與失。相尋無極。則亦安知夫此棠不忽然。一日復在余側也。且夫棠得其居。愈久愈敷。無有斧斤斷腸傷之虞。我行世間。浮雲飛蓬。惟所使之。何有南東夫以不移。俟彼靡常。久近衡從。其志必償。歌以訊之。用著不忘。

柯山賦

入東門而右。回兮原。迤靡以相屬。拔磅礴以陸起兮。是為柯山之麓。其上蕭森而晝霽兮。冠萬竿之修竹。下硤确而堅密兮。拱高林與喬木。散雞犬於危阨兮。雜茅茨於與夏屋。通樵塗之徑。遂兮路。縱橫而斷續。根土石列裂暗竇。谷虛鳴鳥。上下伏獸。號呼俯注。流之蕩瀟。招列山之蟠紆。林巒作態。而蔽虧兮。風雲效技。而卷舒。因固可以開闔陰陽。于一氣。寅饒日月。于大衢。爰有窮人。癯然無歸。曠四海無所投。其

足分后帝命我於山之隈鹿蓬茅之數椽分
撫枵腹而常饑時醉飽而自得分亦杖履而
遨嬉逾山而東席門草藩爰有君子於茲考
槃自種自食隣里莫干圖書滿家兒稚饑寒
相見輒喜有時不冠寄萬事於一笑分不知
食糲而衣單吾不加物以一毫分亦莫愛人
之煥燠悟紛華之多虞分幸寂寞之至安飲
我薄酒歡有餘啜我豆羹甘而腴一作居隱几而休
讀我書乃曳杖歌曰升柯之巔明遠眺分築

柯之崦可以老分終古不忒天之道分于于
而行無喪吾寶分

卯飲賦

張子晨起落然四壁千林相繞霜曉四顧寥寥寒寂先
生惘然而不自得顧視壁間若有物焉短脰
魁腹兮長喙旁啄而推髻上直也雖未知其
何祥而津津然有喜色矣于是童子趨而進
曰是有客曰麴生者願奉先生於頃刻先生
欣然三揖而進之蓋其氣盎盎列而浮兮其

聲瀏瀏和而幽兮。其質醇醇毅以柔兮。先生
曰。甚矣予之不敏也。今日乃知從子之遊于
是體之栗然寒者。溫心之鬱然結者。散已大
忘于寒暑。尚何有于夜旦。揖翹生而告之曰。
吾將旦旦與君周旋。既導君以神良。又餞君
以芳鮮。而可乎。翹生對曰。斥子之泉。吾泉出
兮。揭吾之腹。君腹實兮。陋彼昏之獻嘲。何啻
富子于一日。

鳴雞賦

先生閒居樂道。昧旦而興。家畜一雞。司晨而
鳴。畜之既老。語默有程。意氣武毅。被服鮮明。
峩峩朱冠。丹頂玄膺。蒼距矯攫。秀尾翹騰。奉
職有恪。徐步我庭。啄粟飲水。孔肅靡爭。山川
蒼蒼。風霰宵凝。黯幽窻之紈紈。悅余夢之初
驚。萬里一寂。鐘鼓無聲。聞振衣之膈膊。忽孤
奏而泠泠。委更籌之雜亂。和城角之淒清。應
雲外之鳴鴻。弔山巔之落星。歌三終而復寂。
夜五分而既更。萬戶皆作。車運馬行。先生杖

履而出觀大明之東生
雲水之暑雨賦
提^九山于空虛忽並擊而俱裂壅百川於河
漢乃防隕而一決哀下土之微生何足供夫
摧折方朱鳥之宵中歲仲夏之^作大熱雖悵焚
之一快俄鬱蒸之莫洩叢百指于環堵顧扶
履之安設^作妻熏風於九旬^作淫疾苦於百節付
六鑿之^于渾沌獨天遊而神悅忽脩然而輕舉
固已窺寒門而蹈冰雪攬北斗而酌天酒觀

上帝於玄闕聊逍遙兮窮年俯故車居兮^于蟻
垤。

蘆藩賦

張子被謫客居齊安陋屋數椽織蘆為藩踈
弱陋拙不能苟完晝風雨之不禦夜穿窬之
易干上雞栖之蕭瑟下狗竇之^作易寬先生家
貧一裘度寒曾怯篋之不卹何藩籬之足言
鼓鐘於宮聲出於垣中空然而無有徒望意
而輒還故吾守此敗蘆其固比夫河山若夫

朝陽不出。微霰既零。聲如跳珠。淅淅可聽。及夫衡門暮掩。鳥雀既棲。掛荒山之落景。絡衰蔓之離離。其下榛草樵蘇。往來螻蚓。出入羊牛。覘窺先生。楚然杖藜。過之則望。四隅憫然歌之。曰。公宮侯第。萬瓦連碧。紫垣玉府。十仞塗青。何嘗知淮夷之陋俗。窮年卒歲。乎紫荆也哉。

燔薪賦

歲暮苦寒。烈風不休。先生家貧。衣無重裘。讀

書夜闌。爐炭已灰。先生瑟縮。凄然不怡。顧謂童子。與薪偕來。童子曰。是薪也。陳之壁間。自春徂冬。風日所燠。塵埃所縈。固瀋液之乾竭。枵外槁而中空。唯利促燔。無所獻功。與火相得。赫然大烘。堅稱勁節。久而後燃。後群拮而効技。又熒熒而不煙。於是先生欣然環坐。皆喜。或裸股赤足。或引手張臂。窮谷蕭條。薪炭如土。蓋取之而不竭。顧此樂之甚富。又何必琴材。修直獸材。攫搏漢壁之椒。効煖魏宮之

金辟寒。誰知空山寒夜之叟。敢傲温于狐貉

之前。今供上方炭率斷成

琴材胡麻文鵝鴿色

予到官之明年以事之東海道連水連水令

盛僑以蘇子瞻先生後把菊賦示余余不達

世事自初得官即不欲仕而親老矣家苦貧

糞升斗之粟以紓其朝夕之急然到官歲餘

困於往來奔走之費而家之窘迫益甚向日

悲愁嗟嘆自以無聊既讀後把菊賦而後洞

然如先生者猶如是則余而後可以無嘆也

有蓬四垣張子居官童子晨謁有駒在門張

子迎客平生故人予致其勤餽客以殮擲露

菊之清英剪霜把之芳根芬敷滿前無有馨

膾客愠而作謂余曷然張子始嘆終笑以言

陋雖爾等分則余安子聞之乎膠西先生為

世達者文章行義遍滿天下出守膠西曾是

不飽先生不愠賦以自笑先生哲人太守尊

官食若不厭况於余焉不稱是悞懼敢謀其他

請率予說子無我嗟。真真之中。實有神物主。
司下人。不問毫髮。夫德不稱。享者殃。勞不稱。
費者罰。予身甚微。余事甚賤。聊逍遙於枯槁。
庶自遠于人患。客謝而食。如膏如飴。茲山林
之所樂。予與爾共焉。之。

張右史文集卷第一

張右史文集卷第二

賦

涉淮賦

涉清淮之浩蕩兮。聊以豁吾之幽憂。轉峽石
而下。泛兮。觀波濤之複流。何佛廟之巍峩兮。
隱於兩山之幽。眺東崖之飛閣兮。納萬里之
清秋。昔淮人之倔強兮。恃江左而不賓。方中
原之多故兮。遂竊帝而稱隣。遭世宗之勃興
兮。乘累聖之威神。盡疾馳而奉命兮。戈三揮

而遂臣始盤桓於壽春今蓋嘗到而益振驅
貔虎于順流今臨長江之廣津馳千里之玉
帛兮擁百萬之精軍計其一時之氣兮固叱
咤而風雲嗟百年之幾時兮山川儼其如新
忽人事之幾變兮撫墟廟之湮淪訪遺事于
樵夫野人之談說指餘迹於荒城故壘之荆
榛徒見夫雲悠悠而朝出水漠漠而東流飛
沙鷗於晴渚聽夜櫓于以行舟彼時豪盛此日
廢昔人功業今人愁嗟夫旦之心暮不可求

前之迹後不可再胡為寂寥之前古乃以興
亡而感慨雖物至盛者其存也宜久勢極大
者其亡也可驚方登臨而遠想豈獨予以忘
情

涉淮後賦

和邵

余甲寅之秋自正陽涉淮作涉淮賦既至泗
之臨淮邑之東南皆淮也朝遊夕濟凡淮之
驚畏風濤之變無不歷之矣今秋又以事之
東海至連水入連河舟人告余曰淮水自是

入海矣。予生二十有二年。吳楚秦蜀之國來往。往殆徧。竊悲其跡之不常。作後涉淮賦。以自廣云。
浩淮流之湯湯兮。蕩余舟以沿洄。嗟我居之不常兮。未期歲而再來。始進掉於正陽兮。睨下蔡之窮城。界陳許之北壤兮。望荆塗之兩山。緬川原之迴復。思萬功而慨然。爰係舟於徐邑兮。漫淮隅之兩孺。駕長帆於朝風兮。凌晨河於夜湍。豈所覽之未周兮。恨未窮其本。

禹
原。忍行後而南去兮。稅吾楫於清漣。指溟渤於西北兮。曰此淮流之所還。彼百川之歸海兮。吾固知其必然。惟循源而極末兮。哀余迹之未安。當天時之晚秋兮。風露慘其既至。山峭峭而瘦出兮。水紺潔而無滓。曳孤輪而忽驚兮。出游鱸於短葦。白鷺飛而下來兮。翩如避世之君子。酒芳香而盈盃兮。吾陶陶而日醉。方頽然而遺形兮。孰卑高而賤貴。彼貴者樂其府兮。富者懷其資。無二者之累。余兮何

羈游之足悲窮天下之奇觀兮極覆載之所
藏膏吾車而勿反兮畢吾世而徜徉
談^淡海天^之蒼茫觀驟雨之電霈飄風擊而雲
奔曠萬里而一蔽卒然如百萬之卒赴敵驟
戰兮車旗奔騰而矢石亂至也已而餘飄既
定盛怒已泄雲逐逐而散歸縱橫委乎天末
又如戰勝之兵整旗就隊徐驅而回歸兮杳
然唯見夫川平而野濶夫雲霞風月之容雷

雨電雹之變非巧力之能為蓋人間之絕觀
必也登雄樓傑閣之崢嶸憑高山巨海之空
曠徹除耳目之障蔽而後能窮極變化之奇
狀嗟我居之卑湫兮東觀聽於尋丈顧所欲
之莫得兮徒臨風而惆悵

暮秋賦

嗟余志之莫就兮哀天時之不予謀歲冉冉
以將暮兮無以蕩吾之幽憂昔吾之既有如
今獨信道而不顧鞭吾駒之不戒兮眇一世

而獨驚儼章甫以自好兮。安知越人之異容。
恃所持之不欺兮。謂彼此之情同。夫何事物
之多故兮。因少愚而老智。彼善惡豈有常兮。
固繫夫一世之賤貴。指礫以為玉兮。人皆知
其不然。衆既訛而莫返兮。事隨信而名遷。偽
言實干衆舌兮。至寶賤於獨知。正無助者必
危兮。惡乘朋而或濟。決大河而東奔兮。挽余
舟而上升。嗟爾楫之幾何兮。蛟龍鬱其方怒。
外既揆而度內兮。考舊好之同異。韜九襲以

深藏兮。固可死而不可試。卷杜蘅之幽佩兮。
苞芳蘭之翠衣。畏九畜之不揚兮。時竊陳以
自戲。怨所資之不售兮。非達人之宏規。彼廢
興之有命兮。何憂樂之足繫。奏吾琴之憤怨
兮。酌吾酒之列清。攬芳桂與秋菊兮。聊以駐
吾之頽齡。吾又將之夫深山兮。遂絕世而遠
去。身九浴而後衣兮。齒三滌而後咀。納冰霜
於胸中兮。蕩焦膈之宿汚。求仙人之奇術兮。
與彭咸乎為伍。彼君子之蹈道兮。曷急世之

有知聊逍遙以卒歲兮樂天命而不疑

超然臺賦

蘇子瞻守密作臺於園命以超然命諸公賦之余在東海子瞻令劉

命父來命

或有疑於超然曰古之所謂至樂者安能自名其所以然耶今夫鳥之能飛獸之能馳與夫人之耳目手足能視聽動作自外而觀之者豈不以為大樂乎然鳥獸與人未嘗自以為樂也古之有道者其樂亦然又安能自名

其所以然耶彼方自以為超然而樂之則是其心未免夫有累也客有應之曰吾豈以子之言非耶吾方有所較而後知超然者之賢也予視世之賤丈夫方奔走勞役守塵壤握垢穢嗜之而不知厭而超然者方遠引絕去芥視萬物視世之所樂不動其心則可不謂賢耶今夫世之富人日玩其金玉而樂之是未能富也忘其所有而安之是真能富矣夫惟有之是以貴其能忘之使其無有則將何

所忘耶。予以謂將忘超然為真超然。則其初必有樂乎超然而後忘可能也。予以為樂夫世之樂者乎。然則子亦安知夫名超然者果非能至樂者也。賦曰：登高臺之岌岌兮，曠四顧而無窮。環群山於左右兮，瞰大海於其東。去塵壤之喧卑兮，挹天半之清風。身飄飄而欲舉兮，招飛鵠與翔鴻。莽丘原之茫茫兮，吊韓侯之武功。提千乘之富強兮，憑百勝而稱雄。忽千年而何有兮。

哀墟廟之榛蓬，有物必歸於盡兮。吾知此臺之何時，惟廢興之相召兮。要以必毀而後止，彼變化之無窮兮。嗟其偶存之幾何，聊徼樂於吾世兮。又安知夫其他，或有疑夫超然者曰：豈其知道而未純，曰彼天下之至樂兮。又安能自名其所以然，惟樂而不知所以樂兮。此其所以為樂之全，彼超然而獨得兮。是猶存物我於其間，客有復之者曰：子知至樂之無名兮。是未知世之所可惡，世方奔走於物。

外兮蓋或至死而不顧眇如醯雞之舞甕兮
又似乎青蠅之集污衆皆旁視而笑兮彼獨
守而不能去較此樂於超然兮謂孰賢而孰
愚何善惡之足較兮固天淵之異區道不可
以直至今終冥合乎自然子又安知夫名超
然者果不能造至樂之淵乎百其大夢然皆
鳴蛙賦
余寓山陽學舍夏大雨屋四隅成塘聚蛙以
千計聲鳴不絕夜為不能寐客有獻予以殺

蛙之術曰投余藥一丸蛙無類矣童子將用
之予曰不可復為賦示之
夏雨初止積潦過尺有蛙百千更跳互出幸
此新霽夜月清溢我勞其休歸偃於室於時
蛙鳴若嘯若啼若訴若歌若懼懼若悲若喜而
語若怒而詬若噦而嘔若咽而嗽瘖瘖者之呼
吃者之闕或急或緩或清或濁若羗絲野鼓
雜亂無節兮又似夫蠻歌夷語詭怪之迭作
也爾其困於泥潦失其所處而悲又若夫旱

煖既久。得其所處而樂也。爰有童子持燭來
謁曰。蛙群夜鳴。君寢其聒。考之周官。灑灰驅
蛤。君其教之。余得畫殺。余語童子。爾無是酷
爾樂而歌。爾哀則哭。哭則悲。嗟。樂有聲曲。聚
語群爭。引吭而呼。一日之間。不寧涓臾。蛙不
汝嫌。汝奚蛙誅。萬物一府。誰好孰惡。爾奚自
私。已厚蛙薄。參通彼己。樂我自然。弭爾怒心。
置燭而眠。夜半張子。援枕而吁。顧謂童子。記
吾言歟。前言未完。請卒吾說。物各有時。夫誰

敢過。爾觀夫春露初霽。朝華始敷。文羽清喙。
飛鳴自如。若奏琴箏。而和笙簧。清耳悅心。聽
者為娛。及夫陽春既徂。炎火將極。惡草蕃遮。
淫潦滯積。蛙于此時。生養蕃息。跳梁號呼。意
氣橫逸。子如之何。時不可逆。時乎時乎。美惡
皆然。當其盛時。誰得而遷。及其雪霜既降。木
實草衰。飛蠅聚蚊。孽無所施。於是此蛙歛吻。
收足。屹然土中。一聲不出。黨散巢披。不可終
日。盛不可常。興與衰迭來。子姑思之。奚以殺為

哉

齊居賦

仲夏之月陰氣始至陽既盛而初剝陰浸亨
 而用事水伏畏涸火燎方熾其於人也心實
 過炎而腎受其弊惟人之生受命在子推卦
 曰垢于陽為水微陽所潛元氣之始故火甚
 烈則正氣或因而衰則水受害者君子之所
 深畏於是屏棄燕息滌慮齊居既靜事以無
 形刑又遠眺而高居却紛華而弗陳與淡泊乎

為徒絕嗜窒慾愛精蓄神聲色不御滋味弗
 親冲然與和俱遊湛兮以道合真故能體強
 志寧愉樂壽考遠去疾癘保此難老嗚呼苟
 能推此以盡道考此以察物則豈惟齊戒以
 御時宜其顛沛而勿失且夫冰炭相乘利害
 交至隕真盜和豈獨陰洽陰道心惟微易失難
 常因於侵陵有如微陽則洗心滌慮以却外
 垢虛中保和以全天君故能涉至變而不濡
 更萬變而常存蓋將窮年以齊居豈特養生

而善身乎。常曰：五部... 蜘蛛賦... 魚游假淵，鳥棲求木，而我所宅，獨取諸腹。巢

於墻屋，人不取予。朝蠅暮蚊，食人所惡。彼殘

物以養，而無益于世。雖名入兮，斯蟲是愧。

得友賦 答子造

余趨世之僻，遷獨子子，而無朋信。所樂以直

前，嘗媒化而賈憎。惟物態之多艱，撫危心而

自驚，甘默默以退藏。抱薄技而無成，何吾迹

之不常。旅成周之故京，眷吾游之悠遠。耿誰

語兮吾情。惟夫子之好修，昔固聞乎德聲。獨

顧我而忘勸，握未暖而心傾。發鍵鑰而不疑，

奏金石之鏗鏘。內端肅而粹溫，外炳煥而清

明。嗟我鄙而子奇，謂欲合而莫能。援古義而

見交，愧此意之何勝。既兩盡而莫疑，亦交規

而共評。驅昔愆之無餘，撫新樂而生矜。豈目

前之懽愉，實未得乎平生。惟清洛之名都，窺

園沼之清澄。語寒堂之夜燭，醉春圃之朝英。

徵逸事於初古。亦窮微而造精。投明珠之的
作○歷。鑠報白璧之煌熒。惟此樂之無窮。使我愛日
而兢兢。雖所歷之萬殊。願勿疾兮茲誠。
嗟余生之苦艱。涉世故而多遠。空辟嘲而衆
侮。獨孑孑其從誰。嗟若人之好脩。外洵直而
中竒。挈余手而從指津。謂予車之不迷。遵常度
以夷行。正六轡而安馳。嗟終日而無禽。日固
然而曷疑。惟言動之合符。若方圓於矩規。振

高言於皇極。流餘麗於竒辭。沃道德以相酬。
心厭滿而忘饑。愛日月而畏別。卒悠遠而多
懷。跋余望兮莫瞻。將駕言其從之。何出門之
多艱。頓我馬以嗟咨。山叢叢而造天。車欲進
而畏摧。臨江湖以浮舟。蛟龍鬱其揚鬣。路幽
迴而莫通。心鬱塞而增悲。報瓊瑤以致情。恐
所托之吾欺。惟至技之難投。或舉世而莫知。
倘一遇而見明。蓋至樂之無僂。彼取舍之迷
方。或骨肉而相遺。苟我心之不察。雖親愛而

何特故烈士之報知己。或殺身而不辭。豈以
生而易名。誠內激而志思。風蕭蕭以戒秋蟬。
嘒嘒而鳴悲。白露團兮夕涼。庭木颯其先衰。
羈我馬於東周。蓋三歲其於茲。老駸駸而來
逼。心鬱鬱而不夷。顧所樂之莫從。託宵寐兮
庶幾。酌尊酒以忘憂。寫我心兮陳詩。
遺憂賦
居子。以無與兮。出莫知其所之。獨端居以
終日兮。耿耿然以長思。古之人不可得而見

兮。存者滅略之遺辭。顧一世之異情兮。余誰
者其從之。惟我生之拙迂兮。嗟所慕之名奇。
挹廉清之遺風兮。日吾其進難而退易。百驅
不加於跬步兮。却轡疾返而莫追。踐斯言之
不欺兮。庶吾心之無愧。日月忽其遷流兮。老
忽忽而既來。惟所蹈之日迷兮。撫前心而自
非。欲改故而圖新兮。從靈龜而問疑。兆改橫
而上從兮。史為余而告辭。橫為室而善處兮。
上從直達其無礙兮。豈外拘而中泰兮。或者既

塞而將遂保爾守而無變兮神明於汝其遺
之相利害而為術兮彼鄉人其猶恥美靈龜
之告猷兮得我心之所止彼蹢躅其安往聊
安安以自恃歲冉冉以將老兮草木頹其哀
衰玄蟬號乎高柳兮溢菡萏於清池宵蟲悲
鳴以相語兮朔雨振迅而南窺嗟吾客於東
周兮週天星之三移寫我憂以命駕兮憑高
明以遠視覽平田以茫泱兮瞰清洛之東駛
山重複而南積兮萬嶺轟轟以鱗次微雲灑

霽以忽布兮孤翼滅沒而高逝熊耳高高而
西峙兮女兒奮湧而南危東平州於兩間兮
散佃漁於平地雞犬密其相聞兮溝塹布而
如碁牛羊闌以就牧兮烏鳥號呼以群嬉登
故國之餘墟兮望遺宮之頽基傷者來世而
無窮兮樂者昔人其既止惟達觀其超忽兮
等廢興於一視考物變以自樂兮遺餘情於
酒醴大人無即而非樂兮淺夫俾物以自治
彼方寤我以局促兮我則顧步而廣肆制憂

樂於在彼兮夫何貴乎明智忘吾憂以洋洋
兮將以語夫君子

張右史文集卷第二

張右史文集卷第三

賦

哀伯牙賦

伯牙鼓琴後世無知我哀伯牙似智而愚天
地之間四方萬里知爾琴者一人而已鍾子
既死其一又亡欲彈無聽泣涕浪浪已奏已
聞欲語不可幅塞滿懷無所傾寫折楊黃華
卷歌里曲入邑娛邑入國悅國回視伯牙面
有矜色夫操至伎者必不和衆人之耳而媚

衆耳者。又善工之深恥。違衆者常孑孑其無
與。而冒恥者乃身安而獲利。則亦安知夫至
藝之非禍。而庸工之非祉也。嗟夫。將為至巧
者。必無顧於終身之無與。則至巧之於人。乃
不祥之上器。操不祥之器。終身而不知。則伯
牙者。乃後世之深戒。

石菖蒲賦 序引

歲十月。冰霜大寒。吾庭之植物。無不悴者。爰
有瓦缶貯水斗許。間以小石。有草鬱然俯窺

其根與石相結。絡其意。生暢遂。顏色茂好。若
夏雨解籜之竹。春田時澤之苗。問其名曰是
為石菖蒲也。考諸本草。則所謂養性上藥。仙
聖之已試者也。因賦之云。
歲寒風霜。水落石潔。大木百圍。僵仆摧折。有
草於此。寸根九節。曾是莫傷。葦然茂悅。若處
窟深。隱奧密。而不知戶牖之外。平地尺雪也。
將麋而餌之。私其益於我躬。則不幾於奪也。
曷若致之吾前。儀之以自修。兮。庶乎比德之。

琚玦也

病暑賦

皇昌運之元祀兮予出守乎清穎之區背國
門而南騫兮弭楫乎太昊之墟方炎夏之隆
赫兮閔時澤之不濡魁乘時而行虐兮盜威
烈乎暘鳥駕畢方而駭熒惑兮回祿為其前
驅燼所及於一燈兮何有瓦石與璠璣豐隆
致其微陰兮飛廉蕩西復而無餘野瞳瞳而揚
塵兮何蕭艾之兮敷應龍矯首於下澤兮僅

自免於搞拮鳥呀喙而忘飛兮獸逃穴而深
居嗟人何獨不能兮無乃欲息而被驅昔斲
山之秋筠兮因冰卷而玉舒效功能於么麼
兮曾何足以寧吾軀飽風而為蜩兮又欲泳
水而為魚出寒泉於深井兮竭筋力於輓轡
不計腹之所受兮尚問山崩翹麥之有無辭
曰陰陽循環靡窮極兮時至而變有常則兮
融液金鐵爍山石兮謹視其報在朔易兮玄
陰大冬冰雪積兮無畏其機脩其極兮補完

裘褐戒紡績兮。保我歲寒。以終吉兮。
積雨初止。萬境聲乾。星漢昭回。夜客高寒。晨
起載欣。朝暉在門。起往從之。清明肅然。蚓安
其穴。蝸不遺涎。還開通於滯濕。失沮洳之墊
昏列缺。弭鞭豐隆。偃麾羲和。緩轡而安行。背
扶桑而經天。街顧大田之多荒。乃愀然而興
哀。聊雷霆之一嬉。遽下土而罹災。詔龍蛇一作蟠使
伏蟠。息憤怒之喧隋。日余悔禍於斯人。勞苦

雨師以一杯惠我農師。豈不休哉。

南山賦

贈張嘉甫

南山巖巖兮。其下有人。佩玉而握珠。刻意魯
叟之古經。不習世儒之臆書。我頃見之於宛
丘。貌秀哲而眉疎。別去忽兮幾時。面蒼瘠而
垂鬚。受愛德器之老成。資巧篆於璠璣。問所與
之。謂誰亦黃縞之仙癯。禁八馬之驚驚超。同芻
豢於群鷲。時慷慨而長鳴。恥賤工之附輿。我
行世之多艱。三年困兮。江湖幸天恩之放還。

過都梁兮躊躇奉兩月之周旋越長淮之馳驅屢飲我於山間出翩躚之兩姝舟師告余以當行具篙檣撤於斯頃歲方暮而寒驕犯冰雪於野墟雲漫漫兮乘天風栗栗兮切膚穉楚翳於宿莽妍柳秀於群拈泛羽觴之清冷聊覽物以為娛思佳人兮天末望莫見兮愁予

秋風賦

張子夕坐於堂之南軒有風颯然來自西方

感乎人心異於尋常初披偃乎草木亦從從動乎軒窻張子曰是風也所以成歲而佐陽者乎時也朱火就謝七月始涼既導迎於肅殺又介紹於雪霜其中人也萬竅洒然汗澤為乾纖絺魯縞不勝其單其加物也未敗其形先傷其情未隕其生先奪其英使之喏然委者見於顏色黎然搞者動於聲鳴吾嘗中夜而聽之淅瀝颼颼群動百蟲怨泣悲吟感人忡忡者秋之聲旦起望之清明高潔者秋之

容也於是庶草効實九穀獻功既補於野又
嘗於宮感天時之不留念歲律之將窮張子
曰吾何為乎戒裘褐以備嚴冬而已

南征賦

贈張嘉甫

予文窮而莫諱兮顧四方其何適
毋寧征於江右兮一作左毛土膏其可食
抱朝暮之勝氣兮西山吾以為宅
風干帆於晝日兮余朝發於赤壁
標玉壘之下流兮逝蓬飛於一息
迅沮漳而橫入兮匯揚瀾於左蠡
嫿吾目無恨兮濤

猛獸以噬獰霽光風於木末兮
俟餘波猶未肯平迷失道而問津兮
御於朱明就漁父而陳詞兮
余非湘纍之獨醒父文告予以不治兮
南樵舍而自成破隴畝而溢流兮
石險狠而當道豈舟人之肅洽兮
艇觸撥而欲倒擊余車於桑本兮
猶可以木徒行夷子竈使不得炊兮
余猶可以乞鄰四厚玉之彌漫兮
子騷騷無以為家雖斯人之可懷兮
鳥猶長鳴以而嘆嗟黃蒲田之所橫植兮
歲有秋而登場既狼

庚而竭鄰兮已獨賦乎廩倉饌上方之玉盤
兮上日飽斯人之德歲協洽而蕪兮味柔嘉
余得^豨未食染子指於鼎兮豈不同此臭味使
持節於十郡兮民得此父母顧余懷之倉卒
兮謂一寒之何故雖解衣推食兮曰此小惠
汝弗德我我世之良醫兮藥神膏而可以破
汝腸賦子九言而九頌首兮度百世而足用
閱一世之風波兮曰餘皇吾以為歸宿

碧雲賦

寒臨高而延矚悵天邊之碧雲緬不知余何
思情全至今續紛懷幽蘭之令姿方揚靈乎
上春顧來者之非其人使暴露乎埃塵我有
昔酒與子殷勤終闕莫致實勞我神白日西
馳去故就新發采舒光念當及辰
出公門而偃松酌昔酒於良辰緬再酌而三
爵恍如對乎佳賓畏局促之傷懷聊流暢乎
心神懲荒洵于無筭悠然合乎禮文蕩志文

史晤言詩書世醉不足我醒有餘顧妙物表
韜精道樞真會獨應誰知我娛

出公門人日飲酒賦

歲役七日其名為人受此嘉名酌酒彼惟欣豈

未竹之始和生庶彙而施仁又曰人者三才

之中將中和之肇布易嚴殺之餘冬也乃命

婦子班坐行觴酌已相祝壽考無疆有否必

泰無窮不通請觀庭下之枯折霜霰消而敷

榮羽蟲感陽而群嬉况乎雲間之飛鴻於是

三酌既醉喜有所得安局促而不嘆悟倚伏
之無極

吳故城賦

亂吾舟兮大江夕余濟兮樊口登武昌之故
墟弔西門之衰柳出東郊而南眺訪遺城之
培塿嗟頽墻之迤靡半已平乎耕耨襍谿澗
而沮洳稻冉冉而將秀曰是吳王之故宮兮
昔孫仲謀之所有當弊漢之委地羣虎聚而
啄剖偉紫髯之永圖獨穴據乎江右豈無意

於雍洛易虛夸為善守觀其作都於武昌夫
何儉陋而即安是為大江之上流兮於備敵
焉不繁顧諸將之凡才豈袁曹之敵班欲身
當中原之一面兮事便時利一葦濟乎濤澗
當是之時兩觀萬雉縹闕應門內擁燕趙之
客外屯貔貅之軍笙磬鐘鼓之喧闐旗旛車
馬之繽紛固已包蒙川澤震耀山原安知夫
千載之後陵谷易位夫何遺珠與棄玉顧此
遺墟之將圯於是與客休于祠宮披樵蘇之

微路嗟牛羊之入室固牲酒之不具與客愀
然三嘆而去

余近讀曹植諸小賦雖不能縝密工
緻悅可人意而文氣踈俊風致高遠
有漢賦餘韻是可矜尚也因擬之云

其下... 送神... 莫予... 樂...

張右史文集卷第四

騷

龜山祭淮詞 二首

木裊裊兮蒼山巖回沃重深兮其下九淵東

風歌兮春水舞庭肅肅兮神三燕游雲高兮

見極浦安我舟楫兮君不怒水濱之人兮若

思君菖蒲生兮揚柳春解君旂兮醉君御聊

樂一日兮莫予棄

送神

楚巫醉兮君不留。春風起兮木蘭舟。弭余楫兮飲君酒。君既不顧兮駕龍以出游。凌九江兮勒滄海。萬龍舞兮百靈會。君孔樂兮我思君。望君故居兮其上。片雲水淪淪兮石碌碌。空祠草長兮風雨入。君屋山中春兮鳥鳴悲。明月皎皎兮中夜來。

惠別

洞簫奏兮瑤瑟御。日不足兮繼以夜。吾寧獨此湛樂兮。嘉如余美之宜修。披浮雲出明月兮。

揮衆星不與謀。亦興既成言以命予兮。顧永予之光明。豈獨謂不然兮。托東風以惠聲。嗟言獨何容易兮。有傾身者鬼神中。懷著而必見兮。卷蘭舌而交信。余雖不執子明燭兮。光輝其舍。予而相審者不媒兮。余既獲子於鼻息。舒子聲以歌兮。鳳凰將聞而振羽。結子佩而起舞兮。星斗視子而上下。獨翩翩其不可留兮。君之居可知而不可得。春水渙渙兮余獨飲。君河之曲。鳥鳴群飛兮。其下芳草柳舒舒。其

可攬結兮桃李始就其膏沐行者懷兮別者
思酌君酒兮壽君以不衰撫君舟之悠然兮
將浩渺以南浮航三泛震澤兮舟師告憊而
一息引日星之煌煌兮吾獨望子於南極想
子其下兮鼓聖濤而鞭蛟龍使宓妃不敢巧
笑兮皇英歛衽而來從南風之來兮入余裾
悅余心獨條暢而清婉兮曰是為故人之風
壽安夏旱麥且死民憂之無所不禱雲既興

題魁并序

輒有大風擊去之間而雨塵不辨人物類有
物為之者張子攷於書以為旱之神曰魁意
者魁為之乎作題魁詞

帝治下土兮遠於民撫御萬方兮周無垠物
類億千兮莽莽秦秦出入日月兮運星辰廣必
有容兮潛奸昏不上魁兮帝冒聞歲唐申兮
斗建巳旬逾十兮雨不施秀者焦兮實者悴
麥莽莽兮不出塊舊穀既沒兮待新以食奪
其所望兮民憂以惑捨來未而兵兮奪攘剽賊

急不知慮兮求生頃刻民幸帝兮詔雲師氣
朝升兮斂賜暉孰鼓風兮震川岳上者揚兮
旁者剝雲雖仁兮不得施野童童兮草木摧
孰揚塵兮蔽朝日紛霏霏兮冒萬物昏迷蒙
兮浩恍忽矜者督兮失南北瘞根莖兮腐葩
實世慘錯兮澤蓬煇霍霍然兮侵萬室飄雨
塵兮以旦以夕既曰誰為兮尸是有物其名
曰魁兮早是司惡潤忌澤兮盜陽威淫視搞
木兮疾革滋憎飽妬既兮幸民饑亢不伏兮

風以助之慘懷柔茂兮塵埃是吹乘來炎火兮
爛熳煌馭回祿兮驂畢方朱旗旒兮絳帷裳
坦無畏兮樂洋洋明疫癘兮友疾殃徒甚劇
兮黨甚強慢帝威兮公害戕竊祠禱兮傲驅
攘民賴帝仁兮以衣以食上帝孔昭兮翹無
禍責幸帝震怒兮降魁罪疾無俾在世兮幽
沉深溺雷伐鼓兮電揚旂雨卷壑兮雲張堆唯泛
游澤兮湛甘滋充搞瘠兮奮枯萎禾黍茂兮
蔬果肥歲既登兮民飽嬉康帝力兮恩甚思

幽斯魁兮宥無期

叙雨并引

福昌之民有禱早於西山者取山之泉一勺
祠之不數日而雨邑民言旱歲取水以祠輒
應且其取之者非特福昌也張子神之作歌
以揚之云

西山之泉兮列以清淳注萬古今無虧盈應
龍蟠守兮謹防扃有神司之兮帥群靈神君
曷處兮山之穹雲郭霧闕兮都邃宮騰駕逸

景兮馭清風上友仙聖兮佑帝躬惟今之旱
兮非神曷愬家無餘糧兮麥不庇土飄揚塵
兮迷行錯步魁威孔張兮熾莫余禦挹水一
勺兮薦羔豚曷求於水兮神實憑壁上有蔬兮
林有實芼馨香兮薤芳鬱神我饗兮臨我堂
酌芝醕兮御振漿巫甚祗兮時甚良哀我疾
兮降我祥神君仁兮念下民撫民災災兮號帝
閣帝念神君兮詔雨官叱馭九龍兮奮互飛
騰擊飛電兮致雷雲俾霖沛兮正無限山重川深兮更騰奔角毛羽鬣兮爛鱗鱗前幢後旆兮互雙

輪推轟喧兮翻乾坤神九鬣兮雜蛟鯢瞳睛
飛涎兮翻齧齧伏潛羲和兮止星辰一洒萬
里兮傾河津妖氣失威兮斂以奔魁濡厥裳
兮伏以蹲搞蘇焦澤兮息悵焚優渥潤沃兮
無涯根菽藟說說兮奮裳紳秋種既即兮農
則慙既足而止兮被霧昏朝陽清明兮斂游
塵功成不居兮駕歸雲空山寥寥兮夜無聞
靈泉幽幽兮堪齋淪竭誠莫報兮仁哉君
友山

張子官於福昌塊然獨居無與為友賓客不
至遺朋失舊經時閉門終日鉗口出無與遊
居無與就誰同我養誰酌我酒歸守妻孥出
對廝走駕言出游田童野叟氣吞莫交情包
不剖塞聰蔽明盤足袖手披書閱簡眩目疲
肘厭然成痼不可針灸於是張子滌慮除煩
披庭掃堂枕手而眠恍若有遇如神降焉曰
我實哀汝獨無友朋我有教告子乎我聽此
世之人百愚一賢古昔所歎非獨今然得賢

與朋善固無儼情不可得將愚與比友賢實難
幸然後值不幸友患與無孰利諂笑傾辭韜
情晦實測心獻計因隙投策口是腹非面歌
背泣友若此者實繁孔多曷不若見日清且
和我復告子真友之實爾遵我言友胡有竭
人物雖殊可友同焉賜爾以友其名曰山居
汝左右在汝北為端不汝去澹兮絕言春麗
夏繁秋踈冬瘦霧霞融明風馳雨驟孤揖橫
奔牢屯巧鏤傲岸軒昂清華潤秀對食臨眠

排堂入牖效技汝前雖勞不疲山有佳泉多
灌爾圃壁石懸空冷冷清漱如聞妙音濯煩
浴垢不猶愈於卑議庸譎過耳增愆一入心善
煩者乎山有脩竹汝園是植靜慮明鮮端虛
正直如彼正人揚言發色微風散碧宵月鏤
白不猶愈於市兒塵顏歌眉鼓吻佞笑浮言
正為媚悅善佞曲拳者乎山有喬木聳立而
峙端無媚姿若對正士障雨蔽暘千人所庇
微颺披拂吹奏箏籥不猶愈於蠕蠕鼠輩女

點兒嬌。奴趨妾。痒者乎。山有好鳥。清喉麗羽。
引嘯長鳴。羣呼迭語。夜管風絃。哀箏悲柱。不
猶愈乎。卷歌里舞。促縮跳梁。顛妖淫汚。父子
不施。棄禮忘數者乎。如前寶繁言。胡可殫汝
與之樂。右攀左援。冒為子子。寤寐嗟歎。張子
再拜受言。永懷解累。止憂心。通志開。高山巖
巖。流水潺潺。竹茂木翹。鳥鳴琅然。如前夷齊
而後。閔顏吾乎。為何浩然其間。
種菊

張子病。目眩而視昏。醫者勸食菊者。春夏食
葉。秋冬食華。張子以謂菊華於草木。變衰之
際。而又功足以禦疾。類有德君子。因求而植
諸庭焉。

何馨香之芬敷兮。昌綠葉而紫莖。是其名為
菊兮。爰植子之中庭。性清平而不躁兮。味甘
蕪而充烹。當秋露而慘淒兮。舒煌煌之華英。
色正而麗兮。氣芬以清。純靜秀潔兮。族茂群
榮。採食以時兮。天和以寧。穎輕竅達兮。瞳子

清明散敗流渴蜀兮風宣滯行仙聖所餌兮屏
除臭腥久嗜不廢兮將延爾齡嗟予生兮塞
薄煩真憂饑畏寒兮微祿以生終曷歸兮山
林是營膏梁鼎食兮方丈縱橫炙熊之膳兮
龍醞醞羊羹彼得有命兮吾奚爾榮惟茲佳菊
兮野實以生採擷咀食兮薦俎盈登求之孔
易兮世焉莫爭我有久疾兮壅塞煩昏支節
堅痺兮氣闕於元憊不能支兮外壅中乾疥
癬得志兮螻蛄伏蟄滄華秋冬兮食葉春夏

集新易故兮爾功是假寧康我軀兮骨節堅
良產和剔戾兮其樂洋洋反華於玄易痿以
強忘生絕俗兮深潛遠藏駭駕雲霧兮呼吸
太陽招友彭咸兮御風以翔吁嗟此菊兮吾
於爾望

逐蛇并序

福昌官居北負山為堂有大蛇穴堂北時下
飲堂南水中人皆以為神見者不敢逐或禱
祠焉張子曰是吾居也蛇安得而處且蛇爾

安有所謂神者，作文以逐之。

嗟堯之時兮，大水滂橫，潰四海兮，包陵岡，蕩

流湧，汨兮，周無倖，龍騰蛇奔兮，嬉以狂，腥鱗

頑鬣兮，更披猖，城居穴處兮，亂厥常，頽重糾

結兮，肆害戕，陸盤淵據兮，傲不滅，朋屯黨集

兮，蕃以昌，穿穴噬齧兮，民盡傷，下民既病兮，

帝弗康，黃熊幽極兮，羽山陽，乃命伯禹兮，行

四方，乘高超，卑兮，陸復航，鑿山疏原兮，導河

江，萬水下走兮，來洋洋，經畫九野兮，興農桑

驅龍放蛇兮，屏諸荒，焚山燎野兮，無遺芒，野

巢窟居兮，保厥疆，敢有弗率兮，斷爾吭，伯益

作志兮，稽妖祥，帝虞耄勲兮，黜子商，天授神

禹兮，夏是王，九牧作首兮，金鑑鏗大治，鼓鑄

兮，騰精銑，嚴嚴九萬兮，峙且剛，竒形詭質兮，

走與翔，鱗毛羽卵兮，雜短長，求情扶扶態兮，幽

微軫，制馭百怪兮，嚴紀綱，獸虫人鬼兮，安其

鄉，殊宮別城兮，異存亡，曷為茲，虵兮，宅我居

妖頑，堅老兮，傲驅除，深潛居山士兮，坦無虞，下

飲我沼兮稍林株。朱眸丹舌兮玄鱗膚。恍惚
遠連兮疑有無。居者畏避兮行者除。險奪我
圃兮駭我徒。盜竊祭禱兮欺群愚。我咨爾蛇
兮潛山而穴野。陰蟠遠伏兮與人異舍。冬居
夏游兮時以衡行。食爾之食兮朋爾朋。僭亂我
居兮常失經。叛棄爾守兮帝有利。胡昏頑兮
居以寧。自為不寧兮邀剽烹。荒戾天理兮悖
聖程。我宥爾愆兮逐爾行。亟舍故處兮遐以
征。南山之幽兮雲霧深。真草木蒼蔚兮嶮不平。

爾徒繁兮食爾盈。捕取不至兮居無與爭。汝
生孔遠兮壽爾齡。物違其常兮禍之所集。豐
狐晝游兮冬裘以白。龜厭淵處兮吉凶是卜。
虎不畏人兮皮包戈戟。矜險恃孽兮其終解。
克我言孔昭兮語汝以理。日吉時良兮汝過
以逝。
登高
懷不展兮居無聊。默評語兮浩長謠。寫我心
兮登彼高。陟萬仞兮捫九霄。命清風兮披浮

雲瞰四荒兮視天垠大海蕩瀟兮潛龍鯤吐
吞日月兮制昏明醞釀元氣兮函星辰羽載
四海兮芥浮坤四岳列峙兮嵩中躡牽連脉
絡兮子復孫草蔓木布兮升降如朋障南蔽
北兮東散西分如掌列塊兮盤羅豆罇黃流
中貫兮發源崑崙東驚大海兮榮如繚紳南
方炎炎兮火之所宅朱鳥峙兮丹膺絳翮騫
飛以翔兮輝煌爛赫從擁萬羽兮紛羅羽翼
煌煌尊嚴兮有斗在北升降玉都兮運量帝

側呼吸陰陽兮秉持禍福真仙道遙兮澹不
可揖西有王母兮戴勝穴居壽歷萬古兮忘
終泯初超遠恍惚兮獨與道俱驂友日月兮
群靈走趨既又左而東顧兮觀大明之始生
震沸九淵兮麗天升披攘群陰兮重幽昭明
有神司馭兮朱裳絳纓呼造物以致問兮吾
將放乎太初彼天地其孰始兮日與月其誰驅
四荒漫其何極兮人為胡而中居火何為而
南宅兮水孰使其在北安知東之主人仁兮西

配刑而主殺斗建寅而氣分分疇為四時之
消息世徒知其已然分遂推類而立說彼厥
初其誰造分孰布施而殊別抑其不得不然
兮或者私智之所設將忽然而自爾兮遂已
成而不可絕造物為余寃察兮曰此曷可以
言陳而意悉彼渾純之一氣兮吾不知誰合
而為一忽洞達而兩分兮夫亦安知其誰闢
爰升清而降濁兮水赴陰而火陽東升氣而
敷生兮西或成而害戕強名之曰自然兮曷

足以寃其必至謂不得不然者愈踈兮尚安
取於私智莊周誕而妄推兮華夏愚而臆對
世號余曰造物兮余亦曷有所主尸苟待余
而後造兮彼造余者復誰姑置之而勿投兮
任萬物之自成游小智於太初兮何異夏蟲
之語冰曠任之而勿疑兮萬里會而一平夫
何造物者闢余兮神飄飄而不居我將赴而
遠遊兮神聖以為徒騰九螭之奔輪兮追
飛電而攬奔風周萬里於一息兮堂西極而

有九區叩玉闕之九關兮，覲上帝於絳都酌
 瑤樽之芳酒兮，招赤松而友彭祖。既錫我以
 難老兮，點嗜慾而龍靈。爰侑我以叔藥兮，合
 千簫而吹萬箏。樂吾心之洋洋兮，舒吾體之
 于于。隆復還於我室兮，聊彌日而一娛。
 子由和歸去來辭先生云：東坡公所和陶靖節歸去來
 詞及侍郎先生之作，命之同賦。來未輒自憫
 其仕之不偶，又以吊東坡先生之止終，有
 以自廣也。

歸去來兮，行世不偶。余曷歸，其出無所為喜。
 兮，去而何悲。眇一世之無與兮，古之人逝莫
 追求。不疚於余義兮，又奚恤餘子之是非。彼
 好惡之罔極兮，或顛倒其裳衣。顧吾涉之已
 深兮，愧哲人之見微。吾歸甚安，無所事奔。既
 守吾室，又杜吾門。一氣孔神於中夜，存納至
 和于靈。振兮，挹天醞于玄尊。既克溢於幽闕
 兮，亦粹然而見顏。往有坎而茲夷兮，昔或危
 而今安。將從化人於西域兮，面藏吏于函閭。

將以一世為芻狗兮。廢與興吾厭觀。彼福禍
之一源兮。必茲出而茲還。彼自以為無隙兮。
何異夫石擲盤^之桓。歸去來兮。吾悲斯人之不
起兮。豈招仙聖與之游。昔惠我以好音。忽遠
去而莫求。余曷異于世人兮。初為哽塞而增
憂。彼錢鏰則深藏兮。盡觀夫已墜之田疇。萬
古芸芸共逝一舟。半夜而失。旦號其丘。畏違
觀之。請余涕已泣而不流。悟榮名之取憎兮。
善斯人之獲休已矣。乎萬物之作各其時。吾

獨與時而去留。豈或能力而違之。既往莫或
追來者尚可期。蓋雨暎之在天。豈吾稼之不
耘。彼蜀雄之必傳。作猶愧於書詩。嗟身屈而
道伸於斯人兮。曷疑。

張右史文集卷第四

張右史文集卷第五

君家誠易知曲

張右史文集卷第五

君家誠易知曲

古樂府

君家誠易知易知獨難忘西風墻頭吹葉黃
蟲絲當戶理秋光翠屏碧簾生涼^朝牀頭蟋蟀
見焚香^綫鮫綃碎繡雙鳳凰上元綠髻遮耳墻
來車去馬官道傍碧雲傳情何處郎相望玉
樹啼寒將虫

于湖曲并序

蕪湖令寄示溫庭筠湖陰曲其序乃云晉王

張右史文集卷第五

孰反屯于湖陰帝微行至其營孰夢日遠之
覺而追不及故樂府有湖陰曲按晉地志有
于湖而無湖陰本紀云孰屯于湖又曰帝至
于湖陰察營壘而去頃予遊蕪湖問父老湖
陰所在皆莫之知也然則帝至于湖當斷為
句乃作于湖曲以遺之使正其是非云
武昌雲旗蔽天赤夜築于湖洗鋒鏑已滇綠
駿風作蹄去如滅沒來不嘶日圍萬里纏孤
壁虜氣如霜已潛釋蛇矛賤士識天顏玉帳

髯奴落妖魄君不見銅駝陌上塵沙起胡騎
春來飲灑水浮江天馬是龍兒感踏揚州開
帝里王氣高遠縣百五秋弄兵老淖空白頭石
城戰骨卧秋草更欲居王分上流

襄陽曲

西津折葦鳴策策蟾蜍光入芙蓉白山頭不
雨宵船稀日日門前江水窄將欲烜赫拈行
人旋起舟樓照長陌銀屏深蔽玉笙閒自擘
新橙飲北客倏離暫合心未果淚映雙眸為

誰墮

寄衣曲

秋風西來入庭樹。攀條正念征人苦。窻空自
織不敢任。鳴機愁寂如鳴櫓。練成欲裁新絲
香。抱持含愁叔姑堂。別來不見衣。覺窄試比
小郎衣。更長。

江南曲

江蒲芽白江水綠。江頭花開自幽淑。人家晨
炊欲熟時。旋去網魚惟所欲。往來送租只用

舡。未省泥沙曾汚足。有錢買酒醉隣畔。終日
數口常在。目不學長安貴公卿。每念離心寄
朱轂。朝遊巖廊暮海島。隨人未歸身自到。

怨曲二首

白首南朝女。愁聽異域歌。收兵頡利國。飲馬
胡盧河。毳布腥羶久。穿_穿廬歲月多。雕窠城上
宿。吹笛淚滂沱。
祖席駐征撓。開帆復信潮。隔筵挑葉泣。吹管
杏花飄。船去鷗飛閣。人歸鹿上橋。別離惆悵

淡江鷺宿紅蕉。...
壽陽樓前淮水碧。壽陽美女如脂白。李郎青
鬢照青衫。曾在花前作狂客。伯勞睡重花枝
晚。時許蜻蜓一偷眼。歡娛雖少恨已多。纖手
紅箋揮翠管。淮陽歸來春已暮。夜夜夢魂淮
去。欲歌舊曲只添愁。畫得雙蛾不能語。有客
南來從壽春。衆中笑問動精神。自從柳別章
臺後。攀折風光知幾人。已伴春衫辭側帽。不

怕嬌啼。隨意笑。嗟君耿耿獨相思。須信多情
是少年。

勞歌

暑天三月元無雨。雲頭不令惟飛土。深堂無
人午睡餘。欲動身先汗如雨。忽憐長街負重
民。筋骸長^數十石。擎半袖遮背。是生涯。以力
受金飽兒女。人家牛馬繫高木。惜恐牛軀犯
炎酷。天工作民良久艱。誰知不如牛馬福。

少年行三首

醉兮鵲角蒼鷹羽一作龍金錯旂竿畫貌虎長驅直
踏老上庭手拔干將斬狂虜歸來解見聖天
子金印懸腰封萬戶自為大漢上將軍高揖
郡公佐明主群
人生豈合長貧賤師事黃公曾習戰英雄天
子北伐胡初拜將軍二十餘黃塵如飛羽如
挿身射單于碎弓甲從來書生輕武夫坐遣
揮毫寫勲業

少年賣珠登主門主家千金惜一身綠

講請罪見天子尚得君王呼主人鬪雞走狗一作馬
長安道豪傑驅來奉談笑漢庭碌碌公與侯
畏禍憂誅先白頭

古意三首

園中揚柳樹飛舞似含羞如何風靜處盡放
眼中愁金鋪銀屈膝動處有人挨碁盤作十
字中心為子來橘犀如半月何日是圓時如
何一種味却有兩人知

代贈

洞房飛香作春霧。仙人勸酒香中語。明眸第
二紫雲娘。鶯學歌聲柳如舞。感眉長歎。澧有
蘭銀鈎。請君春草篇。繁絃高張燭。燒夜玉壺
未盡參在天。春泥雪消淮上路。東風浪頭驚
客櫓。惱公舊事幾夢魂。過眼相逢一風雨。黃
流清洛上天漢。吳山洞庭藏水府。謾題詩句
寄歸舟。江口風狂即得渡。

代嘲

過作拋人去。非真我獨知。如何立不定。却有

獨來時

牧牛兒 應城道中

牧牛兒。遠陂牧。遠陂牧牛芳草綠。兒怒掉鞭
牛不觸。澗邊古柳南風清。麥深蔽日野田平。
烏犍礪角逐春草。行老孛卧噉饑不鳴。犢兒
跳梁沒草去。隔林應母時一聲。老翁念兒自
携餉。出門先上岡頭望。日斜風雨濕蓑衣。拍
手唱歌尋伴歸。遠村放牧風日薄。近村牧牛
泥水急。珠璣燕趙兒不知。兒生但知牛背樂。

贈人三首 次韵道卿

未必蝓蟻如素領。故應新月學蛾眉。引成密
約。因言笑。試得真情是別離。樽酒且傾寒琥
珀。淡粧更着薄胭脂。北城月落烏啼後。便是
孤舟腸斷時。
醉裡紛紛散別筵。醒來客枕一燈前。黃茅野
岸三更月。春水長亭十里船。一點淚憑誰寄
與。十年香在恨依然。空疑窻外梅花發。珠箔
青樓若箇邊。

可是相逢意便深。為郎巧笑不須金。門前一
尺春風鬢。城外三更夜雨衾。別燕從教燈見
淚。夜窻惟有月知心。東西芳草渾相似。欲望
高城何處尋。

採蓮子

菡萏香蓮十頃陂。小姑貪戲採蓮池。晚來弄
水船頭濕。更脫新裙裊鴨兒。

晚春雨謠

晚雲欲著樹中夜。一犁雨老農呼孫子。力作

莫辭苦風吹潤土如炊香烹雞為黍餉南岡
我知聖人在明堂元年已是豐年祥

張右史文集卷第五

張右史文集卷第六

古樂府歌詩

倚聲製曲

并序

予自童幼好文字於他文嘗為雖不工要猶能措詞至於倚聲製曲力欲為之不能出一語傳稱禪謀謀於國則否謀於野則獲杜南陽以謂性質之蔽夫詩類曲也然善為詩不能製曲豈謀野蔽耶為賦三首
春綠惹恨鬢雲垂媚態愁容半在眉早是思深難語別可堪肌瘦不勝衣眼前有恨景尤

連門外無情車載脂自笑不如天上月樽前
猶有見郎時

不恨因緣不恨天強持牙板向樽前陽關一
曲動山月別淚千行盈酒船薄命有情今已
笑傍人無意亦凄然願君學取梁間燕秋去
春來到妾邊

山未高兮海不深此情此意薄千金今朝酒
伴雙垂淚昨夜燈前獨擁衾玉筍是時空見路塵屏千里亦通心桃源路絕無人到應許劉郎再訪
尋

獨處愁

高高花飛柳驚愁靜珠簾穉鎖春風閒少年金
鞍照秦地玉卮雙覆塵埃間花間蝴蝶雙飛
舞感觸深心心更苦昨夜陰雲數尺許連宵
變作西窓雨

遠別離

遠別離明當入蜀去酒酣日落客心驚起與
僕夫先議路引車在庭馬在槽桐枝嫋嫋秋
風豪別情悵惆氣不下酒觴翻污麒麟袍緩

清歌慰幽獨。不惜更長更。燒燭贈君髮。上古
搔頭。莫易此心如此玉。平生每笑花飛片。東
家吹落西家怨。但得歸時似別時。相知何必
長相見。

行路難

人生動與衣食關。百年役役為誰閒。四時睡
足鞍馬上。食_去歲錢唐。今長安。車愁羊腸。夜險
折船畏人。鮓_晨最驚湍。九州一身恨。自惜使我
顏色常鮮。歡天冶一氣。成萬象。融即是江結。

是山再領洪鑪錫。融結萬世更無行路難。

白紵詞

二首 效鮑昭

搖輕裙曳長袖。為楚一舞。千萬壽。新詞白紵
聲。按舊朔風捲地來。崢嶸。燕雁避霜。饑不鳴。
高堂酒多華燈明。
回纖腰出素手。髻墮髻傾。釵欲溜。為君歌舞
君飲酒。歲云暮矣。七澤空。湯湯漢沔。天北風
玉壺之酒樂未終。

七夕歌

人間一葉梧桐飄。尋收行秋回斗杓。神官召
集役靈鵲。直渡銀河雲橫。河東美人天帝
子。機杼年年勞玉指。織成雲霧紫星衣。辛苦
無歡容不理。帝憐獨居無與娛。河西嫁與牽
牛夫。自從嫁得廢織紵。綠鬢雲鬟朝暮梳。貪
歡不歸天帝怒。謫歸却理來時路。但令一歲
一相見。七月七日橋邊渡。別長會少如奈何。
却悔從來前歡愛。多忽忽萬事說不盡。燭龍已
駕隨羲和。河邊靈官催曉發。令嚴不管輕離

別空將淚作雨滂沱。恨有盡。愁無歇。我言織
女君莫嘆。天地無窮會相見。猶勝姮娥不嫁
人。夜夜孤眠廣寒殿。
和 玉 琉璃瓶歌 贈 晁 二 弟
火維荒茫地軸傾。下有積水潛鯢鯨。鰲身翻
瀾山為崩。金烏下啄獐龍騰。狂鬚奇鬣萬族
朋。巨神日月雙手擎。夸姁愁思烏戩翎。老魚
戰死風魚腥。長堊下掃千里驚。淺洲一席塊
為城。蠻兒夷女奇弁纓。大舶映天日百程。怒

帆吼風戰飛騰舟中之人怪眉睛獸肌鳥舌
鬚翹擗萬金明珠絡如繩白衣夜明非編繒
以有易無百貨傾室中闇素光出極一作素非石非
玉色紺青昆吾寶鐵雕春冰表裏洞徹中虛
明宛然而深處是為瓶補陀真人一銖衣攀
膝燕生花雨飛瓊羅寶手親挈攜揚技取露
救渴饑海叩師跪請額有眼照番禺寶市無光輝
流傳人間入吾手包以百襲吳綿厚擇又而
歸今子授作爛燦然光輝子文章清明無垢君肺

賜。比君之德君勿忘。與君同升白玉堂。

九江千歲龜歌贈無咎

靈龜千年口不食以背負牀飲其息吾家兩
龜豈徒不食亦不息壽與萬古無終極濟南
晁君博物天地通夜窺牛斗頗似晉司空指
我兩龜有名字大龜為九江小龜為號千歲
老龍洞庭怒蕩覆堯九州禹咄嗟水平流九
江無波拍天浮中有大靈背如丘南風吹楚
澤蓮葉清欲秀有物中作巢一寸主立介冑霞

衣仙人髻如霜。飲以南極之光芒。丹壚老客
不相^見飛渡東海。巢扶桑。邇來蟠桃枝有子。大
如缶。浮雲輕於鳥。江海一回首。青珊瑚柱碧
瑤宮。水仙焚香吹作風。朝戲蓮葉西暮遊。蓮
花東。秋風蓮子熟。歸去清江國。小千歲大九
江。我久不見之。向^回君案前雙。我謂晁^君二物有
似我與子。國有守龜吾子是。燦然天下之寶
器。黃金之勝紫^瑤。天玉端冕史再拜。一逆一
從定大事。我身百無用。頗似千歲潛深淵。不

願人間貯金籍。玉萬富貴但願寄身江上。一
葉之秋蓮。萬物才不木。用舍不在天寄管問是君然不然

老龍洞庭怒蕩覆堯九州。謂半山老人禹
吐嗟水平流。謂迂叟^{本一}老客你瘦容巢扶
桑作朝扶桑浮游輕于鳥。作我身輕若蓬

大雪歌

老農占田得吉卜。一夜北風雪漫屋。屋壓欲
折君^勿悲隴頭新麥一尺泥。泥深來牢風莫
吹。明年作餅大如箕。野人食飽官事少。莫畏

瑟縮寒侵肌。高堂晨興何所為。門無馬跡人更
稀。珠樓玉閣互飛動。坐見貧屋生光輝。無功
及物慙受祿。豐穰幸賴天與之。棄糧遺粒待
雞犬。吾羨何得長烹藜。

孫彥古畫風雨山水詩

山深巖高堂壁青。白日忽變天晦冥。黑風驅
雲走不停。驚電疾雨來如傾。山前雨點大如
手。山下水湧危槎橫。崩崖古樹老有靈。吼怒
直與風雲爭。枝披葉偃闌不怯。萬竅却欲藏

雷霆鞭驢疾驅者誰子。石路嶮澁驢凌兢。日
迷心懼愈不及。來憩樹下如寒蠅。蒼茫直與
鬼神接。恍惚不保龍蛇驚。平居此樂忽入眼。
孫家古圖才可辨。奈何一幅一尺餘。欲奪天
地之奇變。我心愛之良有以。昔若山行親遇
此。一生兩足不下堂。輸爾東家貴公子。

歲暮歌

北風卷雪送暮冬。重雲如山爭塞空。百年老
樹吼欲折。塌翼不見南飛鴻。堂下幽姿亦可

悅點綴小樹花
矜矜老人重裘不能煖
永夜惟守深爐紅
啾啾寒雀飛不起
飢啄凍土藏
枯叢青春欲回水
官怒摧拉未使陽和通
天時平分各司一
興廢誰得專其雄
杜門解轡聊有待
行看馬脚春泥融

光山謠

艤舟淮南望新息
天遣清淮限南北
崎嶇細路入光山
野色蒼涼秋日白
八月獲田稻無水
蚱蜢群飛稻乾死
危橋絕澗間水聲喧
喧

汲水爭瓶罍昏昏落日啣
遠山鳥啼車轍未

得閒縣公吳生我世舊
為我烹羊酤斗酒燈

前醉飽紛就眠五更開門
星滿天長年他鄉

心惘然遠途辛勤難具言

年年歌

年年西風白露天
爛村土釀秋一池原
今年杜門不復出
為愛我庭風日寬
東西相望兩叢竹
正色森森立青玉
朝雲暮雨恣奪凌
翠鳳文章終郁郁
芳榴新栽果不實
下有蕭條冒

霜菊人情雖欲薦我酒物意豈願羸君菊東
籬黃葵色肯麗氣壓滿攔香撲嫩月桂淒涼
何足數蛛網蟲樹窘如束安能卒歲不改芳
正自榮枯隨衆木陶陶吾意方有在瑣瑣眼
前何足錄朝來默坐有佳思病去身輕如脫
楛從來此客望江南何用登樓傷遠目

鴨鵝詞

樹頭玄衣郎神爽聲復清睡先萬目覺起對
殘月星憫世耽睡昏休體攝神不靈招使離衽

席啼呼每丁寧幽人最憐汝未旦起坐聽荒
山多嘉樹春盡故園情

園碁歌

戲江瞻兼
呈蔡秘校

蔡子園碁非我敵我謹事之如大國主盟召
會不敢辭近忽堯陵有驕色鄒邑鄒人戰魯
固非宜於越入吳誰可測願君勿以太自驕
知小深謀戰須免區區江子似却婁我如強
魯端能從凌兢螳臂屢見拒我但憐子心難
得近來措置尤小孳何異穿窬時有獲可憐

痴將不知兵請視吾旗豈宜北飢魚貪餌不
知釣口雖暫美身遭食雖然吾亦守疆場防
患猶須謹蠹賊上攀蔡子雖已遼晉楚周旋
終有日下觀江子行逾遠我進駸駸未知極
嗟余自謂敢忘謹事有其誠難掩抑為君聊
發一笑端欲問我暮視斯檄

周氏行

亭亭美人舟上立周氏女兒年二十少時嫁
得剡船郎即身如墨妾如霜嫁後妍媸誰復

比淚痕不及人前洗天寒守舵雨中立風順
張帆夜深起百般辛苦心不惜妾意私悲鑑
中色不如江上兩鷺鷥飛去飛來一雙白長
淮杳杳接天浮八月擣衣南國秋謾說鯉魚
能托信祇應明月見人愁淮邊少年知妾若
船頭致酒邀妾傾賊兒惡少謾調笑妾意示
爾鴻毛輕白衫烏帽誰家子妾一見之心欲
死人間會合亦偶然灘下求船忽相值郎情
何似似春風靄靄吹人心自融河逢中渚還

成阻潮到蓬山信不通百里同船不同抗妾
夢即時即正寢山頭月落即起歸沙邊潮滿
妾船移即似飛鴻不可留妾如斜日水東流
鴻飛水去兩不顧千古萬古情悠悠情悠悠
今何處問倒瀉長淮洗難盡只應化成淮上
雲往來俱作淮邊恨

咏木辭

紅錦長條當背垂紫檀槽穩橫朱絲美人亭
亭面如雲纖手當筵結金捍撥彈成丁丁咏木

聲春林蔽日春晝晴徘徊深枝穿翠葉玉咏
勞時還暫歇深園斷嶺人不知中有槎枒風
雨枝蠹多蟲老飽可樂山深花靜終日咏雄
雌相求飛且鳴高枝礪觜枝有聲無功忍使
飢腸飽有意却教枯樹青疾彈如歌細如語
曲欲終時情更駐一聲穿樹忽驚飛葉動枝
搖不知處

瓦器易石鼓文歌

周綱既季宣王作提劍揮呵天地廓朝來吉

日差我馬。夜視雲漢。憂民瘼。桓桓方召。執弓
鉞。藹藹申韓。賜圭爵。北驅獫狁。走豺狼。南伐
淮夷。斬鯨鯨。明堂車馬。走爭先。清廟笙鏞。尸
載樂。岐陽大獵。紀功伐。十鼓巖巖。萬夫鑿千
年。兵火變朝市。後世紙筆傳。冥漠迹荒事。遠
貴者寡。嘆惜風霜日。摧剥君誠嗜。古更過我
易。以瓦器。尤奇卓。滿盤蒼玉列。我前制古形。
奇異雕琢。義黃已止。巧偽起。鯨鯨上木。消純
撲。何為獲。此上古器。經歷萬世。遭搜掠。寥寥

墨翟骨已朽。尚有遺風傳。隱約又疑晏子矯。
齊俗陶土團。泥從儉薄。盛云古者宗廟器。斤
棄金玉先。誠確是時此物忝。鼎俎晉梓土鼓。
誠為樂。嗚呼二物信奇絕。賴有吾徒與提握。
不然焉瓦與荒碑。坐見塵埃就零落。
瑤池一片孤飛雪。風急身輕飛不歇。誰將翠
袖遮得歸。十斛明珠換與誰。金龜貴客迎將
去。玉作鞦韆載塵霧。人間不解桃李心。獨與

琵琶自相語。主人白頭情不親。朱樓夜鎖梨
花春。願同花落寄流水。飄出朱門隨路塵。長
恐此生空已矣。從此失身輕薄子。人生但樂
兩知心。誰是瓊瑤孰泥滓。鶯鷺中彈花辭樹。
蝶散蜂驚春日暮。風光不斷流水長。不知片
雪今何處。

梁父吟

豪俊昔未遇。白日無光輝。隆中卧龍客。長嘯
視郡兒。九州英雄爭著鞭。黃星午夜照中原。

君看慷慨有心者。乃是山東高帝孫。老瞞遠
赤壁。抱馬走紫髯。江左空回首。世上男兒能
幾人。眼看袁呂真何有。永安受詔堪垂涕。手
挈庸兒是天意。渭上空張復漢旂。蜀民已哭
歸師至。堂堂八陣竟何為。長安不見漢官儀。
鄧艾老翁誇至計。譙周鼠子辨興衰。梁甫吟
君聽。取擊節高歌為君舞。躬耕曾賤志功名。
功名入手亡中路。逢時兒女各稱雄。運去英
雄非曆數。梁甫吟。悲復悲。古今人事半如此。

所以達士觀如遺。龐公可是無心者。何是鹿
門招不歸。

度關山

度關山意悠哉。秦關路險行車摧。秋雲沉沉
天未曉。關吏正眠。關未開。孟嘗逃秦畏秦逐。
一日歸齊未為速。重扉當道可奈何。搔首蒼
茫空駐轂。主君無言客無計。仰看天星俯相
視。風鳴木響心自驚。吐嗟謾養三千士。下客
趨前敢獻誠。為君試效晨雞鳴。引聲未絕郡

雞應軋軋重門俄。撤兵馬嘶人語車輪轉。斗

一作解重

柄方斜夜初半。奔風絕足欲何追。虎口脫身

提

非素願。孟嘗好士竟何為。纔得雞鳴狗盜兒

意

可憐當日慙慙意。輟食分衣竟為誰。

輸麥行

宋文鑑中選補

場頭雨乾場地白。老稚相呼打新麥。半歸倉庫半輸王。免教縣吏相催促。
羊頭車子毛布囊。淺泥易涉登前岡。餉。買。春。槐。蔭。涼。清。嚴。官。吏。兩。平。
量。出。倉。掉。臂。呼。同。伴。預。享。酒。美。卓。衣。輕。半。醉。扶。車。路。涼。月。出。到。家。
妻。具。飯。一。年。從此皆開日。風雨閉門公事畢。射。孤。買。免。歲。踐。踏。百。靈。社。
酒。相。任。適。

張右史文集卷第七

古樂府歌詩

天馬歌

風霆冥冥日月蔽。帝遣真龍下人世。降精神
馬育天駒足躡奔風動千里。蕭條寄產大宛
城我非爾乘徒爾生。小羗雜虜漫羈絏。撫上
秋風時一鳴。萬里名聞漢天子。內府鑄金求
駿駟。將軍受詔玉關開。靈旂西指宛。玉死天
馬出城天駟驚。胡沙颯颯邊風生。執驅拔尉
再拜馭護羗使者。清途迎麒麟殿上瞻天表。

天臂龍姿自相照。翠鞋黃屋兩迢迢。玉鞵金
鞍相眩耀。東遊封祀被和鑿。甲子北來巡朔
邊。展才自覺逢時樂。致遠不知行路難。物生
從類如有神。地無遠近終相親。居不見莘野
磻溪。耕釣叟。一朝吐氣佐明君。

江南曲

平湖碧玉烟波闊。芰荷風起秋香發。採蓮女
兒紅粉新。煙中笑語隔煙聞。高繫紅裙袖雙
卷。不惜浮萍沿皓腕。爭先採得隱船蓬。多少

相欺互相問。吳兒蕩槳來何事。手指荷花示
深意。郎指蓮房妾折絲。蓮不到頭絲不止。月
上潮平四散歸。舟輕楫短去如飛。斷腸脉脉
兩無語。寄情流水傳相思。

籠鷹詞

八月獲黍霜野空。蒼鷹羽齊初出籠。劍翎鉤
爪。目如電利吻新淬。龍泉鋒。少年臂爾平郊
去。草動人呼躍。寒兔竦身下。擊霹靂忙毛逐。
奔風血濡距。爾能搏兔不能食。未飽中腸行

復繫主人獻免爾尚饑。一生不悟為人役。蒿
間黃雀鳴啾啾。饑啄野粟心無求。賦形雖小
技能薄。不受羈縻得自由。

拳毛駒歌

北窓掃壁陳圖書。殺氣凜凜生坐隅。誰將尺
素画駿馬。云是唐文皇廷衍拳毛駒。龍鬮虎脊視
天地。若滅若沒三萬里。皇天產此誰得之。蚪
鬚十八真天子。擒王滅竇如掃埃。英氣貫日
天為開。黃金甲光照天地。太白羽箭馳風雷。

秦王與單雄信挑戰雄信運鉄梨秦王以
太白羽箭射之中其梨出火數尺雄信遁真龍在廐

萬馬疾下視四海。皆驚駘。捧棘昭陵一杯土。
栢城六馬莓苔古。嗚呼駿馬已埃塵。雖有燕
昭難再覩。

寒鷗詞

寒鷗來時九月天。黃梁蕭蕭人刈田。啼聲清
哀晚紛泊。迭和群音和且樂。朋飛聚噪動百
千。頸腹如霜雙翅去。風高日落田中至。部隊
崩騰鉦鼓沸。高林古道榆柳郊。落葉晴霜荆

棘地志士朝聞歲華田家候爾知寒事壠頭
雪消牛挽犁蕩漾春風吹爾歸投寒避暖竟
何事長伴燕鴻南北飛我滯窮城未知返為
爾年年悲歲晚扁舟東下會有期明年見爾
長淮岸

寒食歌

東風芳草長寒食春茫茫人家掩門去雞犬
自相聒原頭簇簇柳與花行人往來長嘆嗟
舊墳新塚累累是裂錢澆酒何人家桑上鳴

鳩喚山雨雨脚蕭蕭山日暮歸來門巷正春
寒花底殘紅落無數北里悲啼夜未休清絃
脆管起南樓古今歌笑何時盡芳草白揚春
復秋去年巧笑鞦韆女今年嫁作東家婦綵
繩畫柱似當年只有朱顏不如故百人學仙
無一成麻姑不見但聞名萬斛春醪酒痛飲
江邊漁父笑人醒

飛螢詞

碧梧含風夏夜清林塘五月初飛螢屏翠玉

簾起涼思一點秋心從此生。方池水溪雨積
上下輝輝亂凝碧。幸因簾捲到華堂。不畏人
驚照瑤席。漢宮千門連萬戶。夜夜熒煌暗中
度。光流太液池上。波影落金盤。月中露銀闕
蒼蒼玉漏遲。年年為爾足愁思。長門怨妾不
成寐。團扇美人還賦詩。避暑風廊人語笑。攔
下撲來羅扇小。已投幽室自分明。更伴殘星
碧天曉。君不見連昌宮殿洛陽西。破瓦頽垣
今古悲。荒榛腐草無人迹。只有秋來熠燿飛。

齊安行

黃州楚國分三戶。葛蔓為城當樓櫓。江邊布
井數十家。城中平田無一步。土岡瘦竹青復
黃。引水種稻官街旁。客檣朝集暮四散。夷言
啁嚅來湖湘。使君麗譙塗堊楮。門狹不能行
兩馬。滿城鼙噪亂更聲。欲風穀穀黃鵝鳴。最
愁三伏熱如甑。北客十人八九病。百年生死
向中州。千金莫作齊安遊。

山民歲時事。芥鹵猶知拜掃。一百五。平明士
女出城闈。黃土岡前。列尊俎。窮筮粉餌。蒸野
蔬。富家烹羊。貧薦魚。日暮肩輿。踏風雨。江鄉
人家。無犢車。揀花飲酒。山邊市。醉後歌聲動
鄰里。南人相歌笑。相尋北人。聞歌淚滿襟。
黃昏。小秋風。謠
秋風起。秋雲高。連山草木如波濤。大江蕩瀟
魚龍逃。羲和奔忙日車遙。人柱傾側恐不牢。
柯山老人掩蓬茅。畏寒理我舊緼袍。麤糲在

盤有濁醪。醉飽高卧從呼號。

東臯行

秋雲捲盡。秋天清。東臯蕭條雞犬聲。黃葉吟
風聲不平。芙蓉半落更有情。歸來僮僕饑羸馬
疲。城頭樹暗烏欲棲。誰家朱樓人夜宿。微紅
一點。簾開燭

正月詞

紅梢一夜櫻桃雨。簾捲曉晴。鳴鶴語。簾旌細
浪。袞東風。迎得春歸與為主。玉手嬌慵添繡

線欄下菖蒲近相見雲屏曉睡翠翹橫樓上
寒時正五更

二月詞

袞風畫幕長廊靜簾下人眠初日永嚶嚶不
動採花蜂夜來露重薔薇冷芳草長時寒食
天紅牆低處見鞦韆人家無事雞犬閒日暮
芳郊留醉眠

饑鳥詞

北風夜雨鳥翅濕低飛野畦啄遺粒啄食不

飽還畏人嗚呼隔墻自求群我行陳宋經大
澤田荒生芽不種麥空腸待飽明年禾鴉鴉
爾饑獨奈何

苦寒行二首

淮南苦寒不可度積雪連山風倒樹長淮凍
絕魚龍愁哀鴻傍人飛不去霜中寒日無暖
光六馬不能瑟縮不肯驤老僮孤舟且復止堅冰
三尺厚於牆
茫茫楚鄉仲冬月白屋無烟飛走絕空林號

風木斷枝長淮無人冰照雪凍埋釣艘不復
漁南羹未嚼淮中魚要酒頭下擘澄湫水剽取
寒蛟烹腹腴

春詞

寶刀裁花碎羅縠帶臘圓紅黃染粟技頭幾
日即花開世上人情何太速東風未轉北風
嚴返掛銅鈎不上簾莫怪蛾眉呵素指層簷
冰笋玉纖纖

宮詞

效王建五首

夜來霜重着攔干玉殿無塵玉甃寒日日君
王罷朝早禁庭無事一冬閒

簾外微明燭下粧殿門無鑰待君玉玉階冷
地羅鞋薄衆裏偷身倚御床

昨夜新霜滿玉階初冬處處火爐開中宮逐
院傳宣賜南國諸侯進橘來

玉墀夜色晝昏昏催放朝班散放侍臣隨駕上
樓同看雪萬重宮殿一時新

蓮燭千枝夜宴遲君王素筆寫新詩宮人知和

得爭先進。偏愛宋家兄弟詞。

旱謠

七月不雨井泉渾。孤城烈日風颺塵。楚天萬里無纖雲。旱氣塞晝日昏。土龍蜴蜥竟無神。田中水車聲相聞。努力踏車莫厭勤。但憂水勢傷水根。道傍執送是何人。稻塍爭水殺厥鄰。五湖七澤水不貧。正賴老龍一屈伸。

王鼎 贈潘邠老

余居柯山西潘邠老居東九月十一日往過

之。逕蔬圃坐修誠堂竹間。歸飯於龜蟬之間。殊有佳興。作雜言貽之。

有屋可以讀書。有竹可以忘憂。採庭之菊香有餘。烹園之蔬甘且柔。賢哉二子。又復何求。鬼不爾責。人不爾仇。沽酒可飲。江魚可羞。又安用列鼎食珍。佩印封侯。我居柯西。相隔一里。可以杖屨朝往夕遊。未必厭我乞醯與借馬。但只恐慙居赤脚與露頭。不然將吾顏子簞食瓢飲。屢空之樂。又欲翻董生清明玉杯。

登集字皆得解酒名無光皆
千手花間解飽踏春風

未嘗自與

繁露之春秋。空之樂。入。殆。晴。畫。之。亦。即。正。林。
醉中雜言。時。此。書。醉。不。是。醉。吾。醉。子。
老人攀花復藉草。春力看人如醉倒。未容作。
試留陽春東風已與人俱老。東君惜春不惜。
花千紅萬紫委泥沙。已教白日張錦繡。更欲。
平地興雲霞。我欲呼客無酒肉。摘花掉頭悲。
髮禿安得釀酒萬千甕。花間醉飽踏春風。

張右史文集卷第七



